

CAMPANELA DULA ME' SCORA.....

Campanela dula mé scora fora da man
ca te sonat pù da chi di luntan,
incòo fà 'na surpresa
fa, 'mé 'na volta, 'na bela distesa!
Te vedaret, a l'impruvis,
tanti fioeu dai cavei grīs
valzà 'l cò du la scrivania
cun i occ pien da nustalgia
opur dul banc da laur
e pensà a ti cun tantu amur;
e cun rispet, timidament,
seguit cul penser, ma lentament
mia da cursa 'mé chi temp là,
su la scia da ricord pien da buntà;
e pô adasi met giò 'l capell
in dul sīt antic di primm cartell
par rivedé la maestra, sentila parlà,
e su l'abecedari an'mò sugnà;
e su i stess banc, uperari e dutur
ingegner, avucat e muradur
unii da sentiment da fratelanza
a scambiaran la puertà cun l'abundanza;
sa stringiarann insema su chi banchitt
cul stess souris 'mé quand evan di fiuritt,
senza barier, ma dumà cun amicizia
dividerann ul ben, tristeza e letizia
e tucc insema, senza pudur,
divideran an'mò i stess valur.
E anca mi sarò là su chela porta
e la sararò sù an'mò 'na volta
par fà presunera 'na lacrima e 'n sentiment
che la vita la pò rubamm 'mé sabia al vent.